


外夷助勦
江楚助勦
勦撫異同
管蠡一得

瑞之


中西紀事

卷之拾至式拾貳

水為物
江為物
物為物
物為物
物為物
物為物
物為物
物為物



瑞之



中西紀事

中西紀事卷之二十

外夷助勦

江上蹇安

咸豐十年九月英法俄三國先後換約約既成法之使臣噶囉者意在修好且欲收漁人之利於中國因於宴會間自誇其船礮之堅利謂大國如有所需聽從銷售若欲仿式製造亦肯派匠役前來教習演試又請于海口助中國勦賊所有該國停泊各口之船隻兵丁悉聽調遣准王大臣等先後奏聞

上不許也嗣俄人換約遂有助兵勦賊代運南漕之請十月十一日准軍機大臣密寄江浙督撫及漕運總督奉

上諭本年秋間英法兩國帶兵撲犯都城業經換約退兵俄羅斯使臣伊格那替業幅亦即隨後換約該酋見恭親王等面稱髮逆在江南等處橫行請令中國官軍於陸路統重兵進勦該國撥兵三四百名在水路會擊必可得手又稱明年南漕運京恐沿途或有阻礙伊在上海時有味國商人及中國粵商情願

領價采辦臺米洋米運京如令伊寄信上海領事官將來洋船沙船均可裝載用俄旗幟即保無虞等因可國勦賊漕運斷無借資外國之理惟恐江浙地方糜爛兵力不專勦辦如借俄兵之力幫同辦理逆賊若能早平我之元氣亦可漸復但恐該國所貪在利藉口協同勦賊或格外再有要求不可不思患預防法郎西在京時亦有此請著曾國藩等公同悉心體察如利多害少尚可為救急之方即日迅速奏明候旨定奪至代運南漕一節江浙地方淪陷明年能否辦理新漕尚無定議然漕糧為天庾正供自不可缺該商所稱采辦運津之說是否可行應如何妥議章程辦理之處並著曾國藩薛煥王有齡酌量情形迅速具奏欽此嗣經各督撫奏覆有以為借助夷兵事屬可行者兩江督臣曾國藩也以為有害無利必不可行者漕運總督袁甲三也江浙撫臣亦各有意見奉

旨將各摺片發交總理衙門妥議具奏旋於十二月准軍機密寄奉

上諭恭親王奕訢等議曾國藩袁甲三薛煥瑞昌王有齡等各捐片稱江南官軍尚未能進勦金陵即令夷船駛往非但不能收夾擊之效恐於賊相持如薛煥所慮勾結生變尤宜預防該撫所擬令夷兵由陸路進勦非獨經過地方驚擾即支應一節諸多窒礙夷性貪婪一經允許必至索請多端經費任其開銷地方被其蹂躪等語並於英酋威妥瑪來見與之談論終日該酋已吐實語謂勦賊本中國應辦之事若借助他人不占地方于彼何益非但俄法克復城池不肯讓出即英國得之亦不敢謂必不據為己有因舉該夷攻奪印度之事為證借夷勦賊流弊滋多不可因目前之利而貽無窮之患惟此時初與換約拒絕過甚又恐夷性情疑轉生叵測惟告以中國兵力足敷勦辦將來如有相資之日再當借助以示羈縻並設法牢籠誘以小利法夷貪利最甚或籌款銷其鎗礮船隻使必有利可圖即可冀其脛就以為我用倘上海夷人諂請助兵勦賊著曾國藩薛煥量為獎勉續有兵船駛入內地按照條例攔阻並著該大

臣等就見在兵力設法攻勦逆賊毋再觀望至法夷鎗礮既肯售賣并肯派匠役教習演造亦令曾國藩等酌量辦理即外洋師船現雖不暇添製或仿夷船製造或將彼船撥用誘之以利以結其心而我得收實濟其受雇助勦祇可令華夷兩商自行辦理二語係硃筆點改于大局或有裨益仍即在於通商稅內籌辦至代運一節由薛煥招商運津無論華夷一體販運無須與該夷預行會商味性較醜與英法不同其應如何駕馭俾其感順以杜俄夷市德於彼之心亦著曾國藩等妥為辦理將此由六百里各諭令知之欽此于是借代勦運之議遂寢十一年夏總理衙門恭親王等奏勦賊亟宜乘時請購買外洋船礮以利軍行而維大局其畧曰查粵逆起事以來蔓延七八省滋擾十數年推原其始由於道光年間沿海不靖其時散遣之潮勇從逆之漢奸窺見國家兵力不足遂勾結煽惑乘間抵隙一發而不可驟制迨用兵既久財用漸匱外國從而生心得步進步要求無已內憂外患其事不相屬而其害實相因

臣等現辦理外國各事期于拔本塞源是以上年曾奏請
飭下曾國藩等購買外洋船礮並請

派大員訓練京兵無非為自強之計不使受制于人然購買船礮之議曾國藩
等是否辦理無從詢知而當此時事孔急未便再事因循自英法住京後臣等迭
次接晤窺知各國心志不齊互相疑貳是以彼此牽制未敢逞志即如俄羅斯
侵占吉林等處邊界英法兩國均以為非蓋其意恐俄國日益強大不獨為中
國之患即伊等亦不能不暗為之防是其猜忌之情可以想見臣等探聞英國
本有與粵逆兩不相犯之約法國雖欲勸賊以夸其勇而為英國之所制亦不
敢自主迨本年三月間巴夏里自長江來厯言賊情斷無成事之理而江楚各
軍紀律嚴明惟餉項不足船礮不甚堅利恐難滅賊等語臣等自龍絡英法以
求目前尚稱安靜似可睽而就我若乘此機會中外同心以滅賊為志不難漸
次掃盪惟大江上下游均有水師中間並無堵勒之船非獨無以斷賊接濟且

恐由蘇常進勦則北路必受其衝是以上年曾國藩奏陳攻取蘇常金陵須有三支水師其一則由江北造船保裏下河以取金陵之說但造船必須設廠購料興工非年餘不成自不如火輪船勦辦更為得力南省雖舊有二隻並非打仗之船且已有一隻敗壞臣等詢之赫德據稱外洋火輪船大者每隻數十萬兩上可載數百人小者每隻數萬兩可載百數十人船在內地不利行駛若用小火輪船十餘號益以精利鎗礮其費不過數十萬至駕駛之法廣東上海等處多有能之者可雇內地人隨時學習用以入江必可奏效若內地人一時不能盡習亦可雇用外國人兩三名令其司稅司礮而中國雇用外國人英法亦不得攔阻如欲購買其價值先領一半俟購齊驗收後再行全給此等款項據赫德單稱征收洋藥正子稅外一經進口無論販至何處銷售再由各該地方官給與印票仿照牙行納帖之例每帖輸銀若干如辦理得宜除華洋各稅外歲可增銀數十萬可作為購買船礮之用臣等令其將船礮洋鎗價值分晰開

單先行呈送如蒙

俞允擬將價值奏明後即請於上海廣東各關稅內先行籌款購買茲給赫德札文令其購買運到時交廣東江蘇各督撫雇內地人學習俟駕駛得法再入大江應請

飭下官文曾國藩等熟計遵行至法國哥士耆來見亦稱現欲回國請給札令其購買船礮伊即稟稱該國主代為購買俟將來稅項收有成數再行扣還等語臣等以英法事同一律未便意存軒輊如伊必欲請辦亦應仿照赫德開明價值先給一半似於事亦無所損是否有當伏乞訓示施行奉

旨發該督撫等悉心妥議期于必行不得畏難苟安欽此按此項船礮是否購齊如何布置均未見之施行而上年六月金陵之捷惟陝甘總督原帶水師楊岳斌酌留數營及江蘇巡撫李鴻章調派淮揚水師在于龍江關水西門一帶而此次攻城皆陸軍以全力制其死命不聞有小火輪船助勦之說是則以之

滅賊既已失之於前以之禦夷亦難善乎其後蓋內地演習則曠日持久而未
必能精外洋雇募則通賊濟奸而尤為可慮當向帥初攻金陵調派紅單艇船
入江助勦十年之久迄無成功而傳其通賊受賄種種不法是無利而有害也
壬寅撫事既定中國大吏亦請設船礮之局彼時五口通商中外輻睦若乘機
商向外洋購買船礮不特可免異日粵匪入江之禍而其時洋艘皆停泊海口
不悉內地虛實若得小火輪數十號堵截內江則所謂師夷之長技以制夷者
即在於此今自長江通商外洋船隻無論大小靡不駕輕車而就熟路即使中
國仿其制作遷地能良又安能敵其夫人能為之技哉若謂藉以籠絡外夷原奏
內有失此不圖既賊難逆料即英法之籠絡亦恐以無善其後之語則癡人說夢語也
方薛大臣之撫蘇也駐節滬中危如累卵而此蜂蟻子之援遂有與洋商相依
為命之勢自借夷勦賊之議起因

密寄中有受雇助勦祇可令華夷兩商自行辦理之諭適是年之春髮逆大股

竄逼頭港外洋各國以通商各口滬濱為根本之地願效死力英商雖有與粵逆兩不相犯之約至此亦不得不謀以自衛於是英法等國會同官兵水陸夾勦又於上海城垣等處挖濠築堤內守外禦遂連敗賊匪於東西擺渡及高橋等處奏聞奉

上諭英法兩國自換和約後彼此均以誠信相孚此次上海幫同勦賊具見真心為好克盡友邦之誼著傳旨嘉獎並嗣後如有外國協同助勦之處著薛煥隨時迅速具奏以彰中外和好同心協助之意欽此時美國人有華爾白齊文者自募常勝軍願助中國勦賊華爾為正領隊白齊文副之駐守松江先是賊犯松江經華爾白齊文領洋鎗隊連敗賊於迎旗濱天馬山等處茲據華爾等稟明上海道及美國領事官願伍中國臣民更易中國服色由蘇撫奏聞奉旨華爾著賞給四品頂戴花翎嗣滬中之役英法二國勦除浦東之賊於高橋華爾等率隊赴之首先冲入高橋賊壘被賊眾迎戰轟擊連環洋鎗白齊文身

受鎗傷裏創力戰遂將賊壘一律掃蕩奏聞奉

旨白齊文賞給四品頂戴花翎自此英法美三國屢助中國勦辦蘇松太倉各路之匪迭著戰功並奉

旨權授中國總兵副將等官同治元年薛煥解蘇撫職奉旨李鴻章著以三品銜署理江蘇巡撫所有防勦各餉專恃滬城洋稅以資接濟于是各國經稅務之商人及助勦之水師陸隊隨時傳

旨嘉獎而法國連年在蘇浙勦賊陣亡提督三人均奉

旨優卹並賞給該家屬貂皮銀兩二年克復無錫蘇州等處則英將戈登戰功最著權授江南總兵官蘇門之役偽忠帶兵先遁經城中偽職殺其為首之偽王譚紹洸開城納款蘇撫入城梟其偽職八人而是時滬中月報言此等偽職係戈登與之說合許其投誠免死而深以蘇撫殺降為失計亦未知其確否也美國自華爾中鎗因傷病故白齊文遂統全隊傳聞其索餉不遂投入偽忠潛

至金陵續因偽侍竄擾江西同入撫建又由建昌竄入福建漳州之陷白齊文實有力焉昨見上海月報言官兵克復漳州白齊文踞城拒戰被官兵生擒解入大營報中亦深鄙其反覆無常棄順効逆實為取死之由等語予謂上海之役係各夷切膚之災噬臍之痛圖謀以自救者至於蘇浙一帶乃上海甯波二口出入之區故得以稍收其指臂之助若因此而謂夷兵可借則其害將有不可勝言者即如白齊文係美國人恭讀

廷寄謂其性較醞與英法不同飭令設法駕馭以生其感順之心今白逆初次助勦即請易中國服色伍于臣民當奉

褒許賞給四品頂戴花翎其後以戰功屢著至總兵銜與洋外之提督同等一旦狼子野心不可測度馴至于叛逆昭彰死而不悔者夷人好利故偽忠得以言甘幣重攜之然則借夷勦賊之有害無利亦可知矣

庚申之冬予在督師今曾侯祔門幕府見江浙撫臣及漕臣先後咨到奏稿

各有見督師命彙入夷務檔案中時予極以袁漕帥所論洞悉夷情嗣於次年正月奉到

廷寄則

聖明遠慮固已洞燭無遺第寄中于借勦利害覆奏不提一語蓋可否之見一經道破轉使外邦得以覘其虛實持我短長故特秘之

附錄袁漕督甲三覆奏

奏為遵

旨體察借夷勦賊有害无利謹就管見所及密摺覆奏仰祈聖鑒事竊臣承准軍機大臣密寄咸豐十年十月十一日本上諭本年秋間英法兩國云云欽此仰見

皇上撫夷勦賊

聖慮周詳而於利相因

虛懷下問臣忝統師于自當以愚慮所及縷析上陳以備

聖明采擇查我軍勦賊向來水陸兼籌並非專恃陸路長江上下均有水師本與旱隊互相策應如艇船紅單長龍舢板拖罾等船不下數百號所招廣楚各勇器械精良迭著戰功果能統帥得人妥為駕馭不難得其死力非中國無水兵也亦非中國水兵不如外國也今該夷請我軍由陸路進勦該國撥兵三百名在水路會擊以每船數十人計之夷船不過數號而謂必可得手臣愚未敢遽信也且我軍現用廣楚各勇係內地民人尚有因糧餉不足延不起旋竝結黨肆搶情事矧外夷之人祇能將就牢籠而不能服我節制者乎此時協同勦賊即謂自備口糧而我之隨時犒賞亦必不可少幸而戰勝則矜功要挾所求无厭豈能滿其所欲不幸而偶有小挫或船隻損壞或兵丁傷亡勒索賠償又將有詞可藉誠如

聖諭該國所貪在利格外要求不可不思患預防也不但此也我軍水師廣勇

居多該夷之與我為難亦多挾廣勇而來萬一私相勾結其禍更烈即令杜其勾結而以桀驁不馴之徒兩相猜忌則爭端競起必至枝節橫生況夷人素習天主教本年六月即有墨利加國借英夷船隻駛赴金陵傳教之事經李若珠奏明在案髮逆之所以煽惑人心者亦藉天主教為名與該夷所習相同前次既赴金陵難保无暗中串通情弊一旦奉命而來久居內地是不但引虎入室且為虎添翼恐此時招之使來他日不能麾之即去也體察情形熟思審處非特利少而害多實覺有害而无利區區愚衷竊以為必不可行惟求

皇上乾綱獨斷計出萬全與其悔之于後不如慎之于初也抑臣更有請者夷人名為就撫實則包藏禍心不惟我不能得其力其有利于我者該夷亦必不肯為我謀也即如俄夷上年請進火器一萬件彼時外間聞之均以為兩國相爭斷未有官以利器予人者該夷必別有詭謀也繼果藉詞遷延逞其

愚弄之計本年各夷犯順安知非俄夷之唆使耶且俄夷向于內城設館人地最為熟悉本年聞在天津議事者即係前年住俄館之人人都人尚能認識之該夷距我甚近水陸兼通尤不可不加意嚴防也臣愚昧之見本應與曾國藩等公同體察會核具奏但相距較遠道路梗塞一函往復動經數旬且軍情機密設驛站稍有洩露所關匪細至於交商買米借用俄咪旗幟保護運津一節以現在夷情揣之其氣甚驕其心愈侈萬一發價之後事有變遷更恐無計可施都中需米甚殷臣于海運事宜未能深悉應如何設法轉輸確有把握之處曾國藩等自能遵

旨妥辦另候

聖裁所有借夷勦賊有害無利各緣由理合憑情由六百里馳陳伏乞

聖鑒訓示臣無任戰栗屏營之至謹奏